



La neva endesfides del lengaz de la “Aisciuda ladina”

L festejea diesc egn l festival de lengaz e cultura de mendranza, e l fèsc chest tant con apuntamenc, dal 2 ai 6 de mé, che à desche protagonisc ence i “neves locutores”

Na “**Aisciuda Ladina**” che se averc trop: percheche l’ à desche protagonisc chi che non é ladins, ma i é interessé al lengaz e a la cultura del post, e percheche i apuntamenc, pervedui dai **2 ai 6 de mé** che vegn chest an i é te lesc mingol fora de anter, desche agritur, hotie, bar e enscinamai i pré del jouf de Sela. La diéjema edizion del festival del lengaz dedicà a lengaz e cultura de mendranza metù a jir dal **Comun general de Fascia**, dò aer enrescì fora chisc egn passé la desvaliva vides de esprescion de ogne dì de la cultura ladina, conscidran se sà ben la storia e la tradizions antiches, ma palesan ence atenzion per i desferenc elemenc de la cultura ladina da anchecondì l fèsc n vèrech inant: l va ite amo de più te la realtà de la val, olache l’ é tropa jent foresta e non ladinofona, ma de segur interessèda a la cultura de mendranza e che se à fat ite te la comunanza. Na “contaminazion” o miec n azet (l slogan de l’edizion da chest an l disc apontin “**L ladin à besegn ence de te**”) che se pel palesèr desche na endesfida ma ence desche na ressorsa per sparpagnèr fora l lengaz e per sie davegnir. La inaudazion de l’Aisciuda la sarà ai **2 de mé** da les cinch da sera aló da l’**Active Hotel Olympic** de Sèn Jan; per tor pèrt a la scomenzadiva vegn domanà de se scriver ite dant che sie fora i **27 de oril** telefonan te Comun general de Fascia al numer 0462 764500 - Servijes Linguistics e Culturèi. Enlouta vegnarà portà dant chel che l’ é stat lurà fora ti **corisc**, metui a jir delaite de la rassegna, che i à abù na responeta delbon straordenèra, con passa cent persones che à tout pèrt con gran gaissa, anter mèrz e oril, a lezions e ativitèdes de: cojina, decorazion e scultura, schertura creativa, storia ladina e fiore de papier. La scomenzadiva à vedù la formazion di gropes desvalives, con ite ladins e no ladins, olache l lengaz de mendranza l’ é stat esprescion indispensabola per fèr la ativedès. Anter i resultac di corisc, ai 2 de mè, vegnarà metù dant ance l **buffet** endrezà da chi che è tout pèrt ai corisc del chef co la steila Michelin **Stefano Ghetta** de Martin.

Dò chest moment gustéol, l’ é enveze de valuta scientifica l’apfondiment e l laboratorie en cont di “neves locutores”, ai **3 de mé** da les cinch da sera te l’agritur **El Mas de Moena**, endrezà da **Fernando Ramallo**, **professor** de linguistica te **Università** de **Vigo** (Galicia, Spagna), dal titol: “L fènomen di neves locutores e sia consequenzes soziolinguistics e linguistics. Na endesfida per i lengac de mendranza? Enrescides, esperienzes, dubies e oportunitèdes per l davegnir del lengaz”. Ai **4 de mé**, da les cinch da sera te la **Baita Ischia** de **Ciampedel**, la scontrèda la vegn dedichèda ai bec, ma no demò, con la prejentazion del liber de **Alberta Rossi** “La Val di Fassa tra fantasia e realtà”, a chela che tolarà pèrt ence la dessegnadora Elena Corradini.

Ai **5 de mé**, l’**Union di Ladins de Fascia** dèsc apuntament da les trei do marena sun **jouf de Sela**, per l cedeand de canche - ai 5 de mé del 1920 - l’ é nasciù la banidera ladina dai trei colores, simbol de l’unità di Ladins. Tinùltima, ai **6 de mé** da les unesc a **Ciampedel**, se pèl tor pèrt a l’**inaugurazion** de l’**“Stont”**, neva sezion sul teritorie del Museo Ladin de Fascia, soul ejempie restà te val che recorda olache i Scizeres, la milizia populèra da zacan, jia a ge trèr al tulac col schiop per se arcedèr a defener, tel besegn, i confins del Tirol.

Comun General de Fascia
Strada di Pré de geija, 2
38036 Pozza di Fassa (TN)
tel. +39 0462 764500 fax 763046

Elisa Salvi
ufficio.stampa@comungeneraldefascia.tn.it